

## Z parlamentom politiske jewiščo wužiwać

**Ćisk** (RH/SN). Na informaciske zarjadowanje wo Serbskim sejmje je kandidatka Anett Zahrodnikowa zawčerawšim do Ćiska přeprósyla. We wjace hač dwuhodžinskim čilym rozmołwnym kole předstaji so wosom kandidatow z Delnjeje, srjedźneje a Hornjeje Łužicy za přeni serbski parlament. W diskusiji jewješe so přeco zaso prašenje za zhromadnym džěłom z Domowinu. Tajkeho pak praktisce njeje. Sobiiniciator demokratiskeho hibanja Tomaš Čornak skedźbni na to, zo su mnozy z nastajenych kandidatow z čłonom Domowiny. Słyšeć tež bě, zo njeje třěšny zwjazk poskitk přiwzał swójskich kandidatow namjetować.

Wjacori diskutanca wutoru w Ćisku zwěsćichu, zo bohate wólbne wobdźělenje tomu polěkuje, serbske institucije a tak tež Domowinu lěpje zaznawać. Wšako móhli Serbja ze swójskim parlamentom přeni raz politiske jewiščo wužiwać. Wězo zajimowachu so přitomni za ličbu registrowanych wolerjow. Wólbny nawoda Hagen Domaška drje na to njewotmołwi, rjekny pak, zo su so zapodate próstwy wo registraciju minjene dny wšědnje popjećorili do podzesaćorili. Listowe wólby 3. nowembra wotzamknu.

Wučerka z Wojerec chcyše wědžeć, kak z wólbami zwjazane kóšty zarunaja. „Bjezwuwzaćnje z darowanjami“, bě wotmołwa. Měrcin Herman z Ćiska prašeše so za juristiskim zawěsćenjom wólbow, wšako je dwěle na jich legitimaciji słyšał. Předleža posudki, přitomni zhonichu, kotrež wobkrućeja, zo status wólbow zakonje njezrani. Němski wopytwar Manfred Jach njeje hibanje dotal znał, na kóncu čuješe so wón derje informowany.